


Izjava Visokog predstavnika i specijalnog predstavnika EU, Valentina Inzka na konferenciji za medije održanoj u Sarajevu



Danas sam donio Odluku o privremenom finansiranju Federacije BiH (za period januar-mart 2011) kako bih osigurao da ne dođe do prekida isplata penzionerima, ugroženim kategorijama građana i drugim budžetskim korisnicima u Federaciji – posebno za vrijeme hladne zimske sezone.

To znači da sam djelovao umjesto Doma naroda FBiH i donio Odluku o privremenom finansiranju koju je predložila Vlada FBiH i usvojio Zastupnički dom FBiH. Ja nisam mijenjao niti dopunjavao odluke koje su ranije usvojile ove institucije.

Ovu odluku sam donio u konsultacijama sa mnogim lokalnim liderima kao i sa Upravnim odborom Vijeća za implementaciju mira.

Upravni odbor PIC-a dijeli moje velike frustracije i razočarenje zbog toga što su političke stranke, kao i organi u barem četiri kantona, blokirali konstituiranje Doma naroda, te, na taj način, i drugih institucija vlasti u ovoj zemlji.

Drago mi je da mogu najaviti da moja odluka ima punu podršku

svih članova ambasadora Upravnog odbora.

Ovu odluku sam donio nerado, ali bez oklijevanja; ja sam oduvijek preferirao da lokalne institucije rade svoj posao bez uplitanja izvana. Ipak, postalo mi je jasno da je isteklo vrijeme da lokalne institucije osiguraju nastavak plaćanja budžetskim korisnicima u narednim mjesecima.

Moja odluka je zasnovana značajnim dijelom na razgovoru sa onima čiji prihodi im jedva omogućavaju da prežive. Ti ljudi su zabrinuti za to kako će sutra sebi osigurati hranu, kako će platiti račune – zanimljivo je da su mi rekli da se političari nikada nisu s njima sastajali. Bilo bi nesavjesno dozvoliti da, sa penzijama od 300 KM, na primjer, stotine hiljada ljudi pate zbog političkog ćorsokaka.

Moje je mišljenje da penzioneri ne treba da postanu prosjaci i da društvo treba pomoći onima kojima je najpotrebnije kako bi dostojanstveno živjeli svoje živote.

Međutim, želim biti kristalno jasan: Moja intervencija nije poziv onima koji su odgovorni za opstruiranje donošenja Odluke o privremenom finansiranju da nastave sa svojim političkim igrama moći koje se bezobzirno vode 'preko leđa' najugroženijih dijelova društva. Sa ovom mojom objavom, ova priča se ne završava, sasvim suprotno.

Kao što znate, finansiranje u Federaciji je sada osigurano za period od 1. januara do 31. marta.

To znači da sat sada otkucava; ima još 9 sedmica tokom kojih zakonodavna i izvršna vlast FBiH mora biti formirana i budžet za 2011.god. usaglašen i usvojen kako bi se osiguralo da sve isplate u FBiH ne budu u potpunosti zaustavljene.

Ovo znači da četiri kantona koja nisu izabrala delegate u Dom naroda moraju prestati sa blokadom i ispuniti svoje ustavne obaveze. Ukoliko to ne urade, politički lideri koji stoje iza ove opstrukcije će morati snositi punu odgovornost za sve

posljedice koje uslijede.

Dužnost onih koji su izabrani jeste da implementiraju izborne rezultate te da osiguraju dobrobit svojih sugrađana. Prošlo je više od 100 dana od izbora, i više nema nikakvih izgovora za neuspjeh političara u ovim kantonima da urade posao za koji su izabrani.

Zajedno sa Upravnim odborom Vijeća za implementaciju mira, konstantno ću razmatrati situaciju tokom narednih sedmica. Ukoliko se blokada nastavi, nećemo isključivati mogućnost dodatnih mjera kako bismo osigurali da demokratskim institucijama bude dozvoljeno da funkcioniraju te da stranke i pojedinci koji opstruiraju formiranje tih institucija budu pozvani na punu odgovornost zbog njihovih postupaka.